

Parisen atxilotutako Arantxa Inurrita aske utzi dute

Aizpuru Badiola da, antza, Villejuifen atxilotutakoa eta ez Elejalde

Joan den asteartean Villejuifen atxilotutako Arantxa Inurrita aske utzi zuten atzo goizean. Iratx alaba, aldiz, bart arratsan aske uztekoa omen zuten. Aitzitik, polizia iturriek atxilotuen artean Koldo Elejalde zela ziotena, Aizpuru Badiola ataundarra litzateke. Mayor Orejak eta Debrek hirugarren bilera egin zuten atzo hiru hilabete epean.

Hur Gorostiaga / Baiona

ASTEARTE eguerdian Villejuifen atxilotutako Arantxa Inurrita aske utzi zuten atzo, bi egun Paris-ko Polizia Judizialaren seigarren sekzioaren egoitzan izan ondoren. Operazio berean atxilotu zuten Mikel Zuriarrainen emaztea goizaldean irten zen, eta poliziek errandakoaren arabera Iratx Zuriarrain gauean berean aske uztekoa zuten.

Bizkitartean, Lasseuben atxilotutakoak eta Parisen atxilotutako Daniel Dergi eta Aizpuru Badiola —nahiz Poliziak Koldo Elejalde zela erranan zuen— Polizia Judizialaren egoitzan ziren bart. Julian Atxurra eta Laurence Schlechti atzemandako orde-nadore eta disketeetan zegoen informazioa atzeman nahirik aritu ziren adituak atzo, baina kodigo bereziz gordeak zeudenez, zenbait egun beharko dituzte bertan dagoen informazioa atera ahal izateko.

Atzo ere zenbait zehaztapen gehiago jaso ziren operazioaz. Julian Atxurra segimendua-ekin hasi omen zen, Paristik Lasseuberraino segitu baitzuten. Lasseubeko baserria zaintzen ari zirela, berriz, Daniel Dergi agertu



Jaime Mayor Oreja eta Jean Louis Debre, Espainia eta Frantziako Barne ministroak, lehenago eginiko bilera batean.

EFE

omen zen zilindrada handiko motor batekin. Gauean bertan, Dergi baserritik atera eta Parise-raino segitu zuten. Izan ere Daniel Dergi 1994ko udan ikusi zuten azken aldiz, Biarnoko Sauveterre herrian motor indartsu bat ebatsi omen baitzuten.

Mikel Zuriarraini dagokionez, polizi iturrien ustez Nikaraguan izandakoa da. Pototo, Dergi, Zuriarrain eta joan den uztailean hastapenean atxilotutako Pedro Badiola eta Raul Becirekin batera ETaren aparatü logistikoak kolpe gogorra jaso duela uste dute polizi iturri frantsesek.

Mayor eta Debre elkarrekin • Jaime Mayor Oreja Espainiako Barne ministro denetik, hirugarren bilkura egin zuen atzo Jean Louis Debre kide frantsesarekin. Borroka antiterroristaren elkar-lana bultzatzeko bileraren ostean «beste pauso bat» emanen zutela iragarri zuten bi ministroek. Gisa horretan, Alain Juppe lehen mi-

nistroak errandakoa berretsi zuen Debrek, Frantziako Exekutiboarentzat ETaren kontrako borroka eta Korsikako desoreka lehen helburu direla azpimarratzeko. Helburu horretan, 2.000 polizia gehiago izanen dira sentiberatatzat jotzen dituzten lurraldeetan.

Jaime Mayor Orejak ere, gogoz txalotu zuen bi estatuen arteko elkarlana gai antiterroristetan. Gisa horretan «ETak Frantziaren santutegia» bukatu dela adierazi zuen, «ETako kideak gorderik bizi baitira berdin Frantziaren eta Espainiaren». Ildo horretatik, beren indarrak Iñaki de Gracia Renteria eta Mikel Antza ustezko ETako buruak atxilotze-
ra bideratuko dituzte batez ere.

Jaime Mayor Orejak Frantziaren eta Espainiaren arteko harremanak «Europako Batasuneko bi nazioaren arteko harreman eredugarriak» direla azaldu zuen, Debreri elkarlan horren iturburuan egotea eskertzeko. X

Vera eta Argote deitu ditu Donostiako epaileak

■ Inputatu gisa deklaratu beharko dute 'Urigoitia kasuan'

Efe / Donostia

IRAILAREN 24an deklaratu beharko dute Rafael Vera Segurtasunerako Estatu idazkari ohiak eta Jorge Argote Espainiako Barne Ministerioko abokatuak Lutxi Urigoitiaren heriotza aztertzen ari den epailearen aurrean. Justo Rodriguezek, Donostiako 2. instrukzio epaitegiko epaileak, Vera eta Argote inputatu gisa deitzeko erabakia jakinarazi zien aldeei, eta honen arrazoia joan den ekainaren 16an Luis Roldanek epaitegi berean eginiko adierazpenak dira.

Deklarazio horietan Roldanek adierazi zuenez, Argotek eta Verak esan zioten Jose Ramon Pindado kapitaina Lutxi Urigoitiaren heriotzaren inguruko frogak faltsutzeko etorri zela Donostiara. Roldanek azaldu zuenez, dei baten bidez Argotek Pindado kapitaina Donostiara bidali zezan eskatu

zion. Ondoren, beste dei batean, horren zergatia azaldu zion. Roldanek esandakoaren arabera, dei horretan Argotek esan zion Pindadoren eginbeharrak Donostiako epaitegian sartzea eta balen aurkako txalekoa aldatzea zela, horren ordez aurretik bala bat sartua zuen txalekoa ezartzeko. Roldanek, ordea, aldaketa ez zela egin adierazi zuen, guardia zibilek txalekoak jada bala bazuela ikusi eta berriro bere lekuan utzi baitzuten. Gauza bera gertatu zen guardia zibilak polizi operazioa gertatu zen Trintxerpeko etxean sartu zirenean: hau da, bala bat aldatzera joan ziren, baina paretean zegoena bertsio ofizialarekin bat zetorrela ikusi zutenean ez zuten aldatu. Argotek kontatutako bertsio hau Rafael Verak baieztatu ziola eta zehaztasun handiagoak ere eman zizkiola adierazi zuen Roldanek. X

CESIDeko paperei sekretua kentzearen kontra da Pujol

■ Felipe Gonzalezen kapital politikoa goraipatu du

Efe / Bartzelona

JORDI PUJOL, Kataluniako Generalitateko lehendakaria, CESIDeko paperei sekretua altxatzearen kontra azaldu da. «CESIDeko paperak ez dira desklassifikatu behar», esan zuen Jordi Pujolek herenegun gauean Antena 3 telebistan. «Legezko testu batek ere ez du esaten CESIDek sortzen dituen paperak Justiziari eman behar zaizkionik», gaineratu zuen Generalitateko lehendakariak. Paper horiek prentsara filtratzeko arriskua aipatu zuen, sekretupean zeuden sumario batzuekin gertatu den bezala.

Jordi Pujol, baina, ez zen ohar-tu epaileek eskatzen dituzten paper gehienak dagoeneko argitaratuta daudela.

CESIDeko paperen desklassifikazioaren kontrako jarrera horren atzetik Felipe Gonzalez eta PSOEren kaltetan sor daitzekoen ondorioen beldurra dagoela esan daiteke Pujolen hitzak entzunda. GAL auziak PSOeri era traumatikoan ez eragitea espero du Pujolek, «herriaren onurako». «Gonzalez», segitu zuen, «Espainia-
rentzat eta Europarentzat kapital politikoa handia da, PSOE ere bada, eta ez zaigu komeni behar baino gehiago kaltetzea». X

Landa: «PP eta EAJ euskal gazteriaren beldur dira»

■ Kaleko istiluak eragozteko aurreproiektuari buruz aritu zen

Erredakzioa / Donostia

KARMELO LANDA, Herri Batasunako parlamentarioa, PPk eta EAJk kaleko istiluak eragozteko lorturiko akordioari buruz mintzatu zen. Landaren aburuz, horrek argi uzten du «Estatu polizial eta autoritario» batean gaudela.

HBko Mahai Nazionalako kidearentzat, poliziei aurpegia ez-talitz eta euskal herritarrek bideoz grabatuz lortzen dena «kaleak komisaria eta kuartelen jarraipena» izatea da. Horregatik, Landaren ustez, «Orwellek bere liburuetan gizarte autoritarioei buruz eginiko iragarpen

beltzena errealtate bihurtzen ari da».

Honek guztiak, Landaren iritziz, «PP eta EAJ euskal gazteriaren beldur» direla eta «askatasunari izua» diotela adierazten du. EAJri «kaleak bideoetatik, Poliziaren presentzia etengabe, itogarri eta errepresibotik eta abarretik libratzeko» eskatu dio.

Horri kontrajarrita, HBko parlamentarioak «Euskal Herriak askatasuna behar» duela uste du. Landaren aburuz, «Euskal Herriak irtenbide politikoak behar ditu, ez kamera errepresiboak. Euskal Herriak alternatiba demokratiko bat behar du». X



WALL STREET INSTITUTEK ingeles eskola zabaldu du Donostian.

Ingeles eskolak emateko mundu guztian ikastetxeak dituen Wall Street Institute bere zerbitzuak eskaintzen hasi berria da Donostiako Peñaflorida kalean zabaldu duen ikastetxean.

Institutuak berak egindako metodoa erabiltzen dute irakasleek Euskal Herrian eta Espainian erakundeak dituen 70 ikastetxean.